

GJERARCHIE

La gjerarchie `e je une scjale: in cheste scjale ogni scjalin al è formât di trentedoi dinc', pôc sù pôc jù! Une scjale di gramulis. Qualunche iniziative che interessi il public e un grum di chês privadis, prime di lâ in vore a' scuègnin passâ sù par chei scjalins: in ogni scjalìn ur tocje di fermâsi; e cjapâ une smorseade. Dopo a' tòrnin jù, simpri un scjalin a la volte, e ancje te tornade indaûr a' cjapin tantis smorseadis ch'a' son i scjalîns. E ce ch'al reste al reste.

Cheste scjale `e je stade bragagnade un pôc a la volte, e simpri `e va slungjansi di qualchi scjalìn e mai un scjalìn nol ven tirât vie. Ogni volte che ai parons ur càpite par man une gramule... disocupade che no san ce fâ di jê, a' scuègnin zontâ un scjalìn te gjerarchie; une volte sistemade la gramule, Di' uardi a fevelâ di butâle de bande e puartâj vie il pagnut. Bausâr cui ch'al dîs che il guviâr nol pense `e disocupazion: chel stermini di masselis che fôrmin la gjerarchie burocratiche a' son masselis disocupadis che àn cjatât ce rumiâ par grazie dal guviâr. Si sa che un muridôr, un fari, un fornasâr no puedin jessi metûz te scjale gjerarchiche, parvie che lì bisugne savê tignî, dret o stuart, il penâl in man!...

Lis personis quilibradis a' disin che la gjerarchie `e je une necessitât, par controlâ, par meti impediment es camoris, par controlâ e organizâ il lavôr dai diviars ufizis... Ah biadins! Se no si pò infidâsi dal personâl di un ufizi, parcè si varessial mo' d'infidâsi dal personâl di chel altri che j sta parsore a controlâlu? Esal formât di umign di altri stamp, di une umanitât diferent che dèi garanzie di plui onestât? E se je cussì, parcè esistial ancjemò un altri scjalìn plui alt a controlâ il lavôr dai controlôrs? In tune umanitât di gramulons, plui curte `e je la scjale e mancul gramuladis si cjape.

Ma chestis a' son ideis busaronis e soversivis. Intant la nestre vite `e je dute un viaz di une massele a chê altre e la plui part des fuarzis e des risorsis `e va piardude jenfri i dinc' des tantis indispensabilis gramulis. Cu l'instituzion dal ordenament regjonâl in Italie a' varessin vût di lâ a finile su la gratule une vorute di chestis dintiduris: prefeturis, diputazions, e ufizis provinziâi di ogni fate, ridusint la scjale a tre scjalins: cumon, regjon, ministeri. Mari sante, ce discors sono chesc'? Il guviâr, ch'al è sentât sul scjalin plui alt, al à cjapade la difese dai scjalins che lu tegnin sù: zontâ un altri scjalin - la Regjon - parcè no? Ma butâ vie chei ch'a son za in vore, nancje par insum! Ce fasarèssino dopo?

Chesc' dîs, culi a Udin, `o stin gjoldint un zughet ch'al val une monede: il Cumòn in barufe cu la Zonte provinziâl: doi scjalins che si muàrdin un cul altri. Al pò ancje stai ch'al vebi un fregul di reson il scjalin plui alt, parcè che si stente a capî cun ce criteri ch'al va dât un premi straordenari al personâl di un ufizi cumunâl (chel dal dazi) che al à fat nome il so dovê.

Ma alì al à di jessi un berdei di precedenz, di disposizions governativis contraditòriis, di pratichis tignudis indaûr a pueste e ce sao io. Il personâl de Comune di Udin al à za una pae une vore plui alte di duc' i sporjecjarte di chei altris ufizis.

Ma chê de gratifiche `e sarà nome une scuse par protestâ cuintri la Zonte che à il vizi di gramolâ masse fuart e masse dispes lis decisions dai Conseis e des Zontis Cumunâls. Parcè che il biel al è che in Italie a' son tornâz a vivi i Conseis Cumunâi, ma par no liquidâ un scjalin; no je stade tocjade la lez cumunâl fassiste che no ur lasse facultât nancje di dâ un buine man pes fiestis di Nadâl al uardean dai vespasians! Biele, nomo?

Che vivi, duncje la gjerarchie.

Patrie dal Friûl, n. 2, 16/31 di Zenâr 1950